

欽定剿平粵匪方略

欽定剿平粵匪方略卷八十六 甲寅年

三月十八日

丁巳

琦善奏言查皖省賊匪由豐工

渡河竄入東境亟須防另股賊匪續行北竄又
須防北竄之賊敗回南奔宿遷實爲南北咽喉
清江屏蔽且濱臨黃運兩河爲山路湖路輻輳
之區北入兗沂均屬寬平驛路南距清江僅兩
日程無須經由徐郡清江五方雜處並無城郭

若宿遷有備則清江可以安枕宿遷地方實較
徐州爲衝要徐州有百勝帶兵駐紮又有袁甲
三在宿州距徐較近蔣壩又經河臣布置尙足
以資防剿至宿遷僅有山西防兵八百餘名文
煜係專辦糧臺之文員於帶兵旣非所長亦難
兼顧臣通盤籌畫似宜先其所急與其增兵以
守徐州不若嚴扼宿遷爲得計當酌撥吉林頭

二起馬隊五百名直隸大名兵二百名陝西延綏兵二百名共計馬步官兵九百名派令副都統德崇額頭等侍衛客照總兵錫綸帶領前往宿遷駐守其原派之山西防兵卽請歸錫綸管帶以資聯絡查自來用兵合則見多分則見少全仗哨探迎擊不在按處分守乃不諳兵法者往往畸零分布必欲處處有兵遂致處處兵單

甚至築室道謀十羊九牧僨事半由於此現在
楊以增百勝袁甲三李湘棻厲恩官皆有帶兵
之責卽皆有調兵之權而諸臣各駐一方各顧
一面無暇會商儻將此駐守之兵紛紛檄調顧
彼失此朝令夕更恐政出多門弁兵無所適從
臣是以特派大員前往以資備禦並囑其毋聽
他處調動致賊匪得以乘閒而入庶可以一事

聞

權而專責成至吉林頭二起官兵本在六合防
堵今撥往宿遷誠恐六合兵單已飭總兵多隆
武帶領山東官兵四百名前往六合接替奏入
報

同日張亮基奏言臣查臨清州城經該州知州
張積功等登陴守禦復挖破該逆地洞數處連

日出隊均轟殺賊匪數十人十四日臣親往督陣突有紅衣賊目帶領二百餘人向我兵施放大礮勇目周學文先點擡礮將賊目轟斃倒地並擊斃餘賊數十名都司王殿元等又擊斃多賊餘匪奔竄入巢臣又督隊直攻東門外楊家橋一帶賊穴賊從南北兩路突出其衆約有萬餘抄襲我後我軍分五隊迎敵該逆旋退旋撲

勇目李朝俊馬進科各手刃賊目一名係僞冬
官副丞相許姓僞檢點郭姓並奪獲大小黃旗
三十餘面擡礮二尊刀矛雜械不計其數乘勝
進攻九家村蔡家村將其兩處巢穴燒燬又復
斃賊無算約計不下二千餘人洵足大快人心
張亮基又奏言臣前在景州連接稟報知南路
逆燄甚熾一係沂州一路一係豐單一路而濟

甯所屬之金鄉縣復爲賊陷該州素稱富庶又屬適中之地各路皆可救援臣當自景州取道山路帶勇南下途次探知沂州各匪大被懲創情形已緩而逆匪進踞張秋臣卽改由湖路進勦迨臣抵東平距張秋七十餘里該逆又由張秋西竄彼時曾知會善祿速由東昌進扼西南飭知崇恩速由鄭家口移師臨清臣一面馳赴

臨清迎頭遇其北竄奈賊已由莘冠等縣直撲
臨清統計臣自景州繞赴臨清先後一十五日
計程一千三百餘里裹糧卷甲心急如焚猶幸
馳至臨清尙得與賊接仗方冀勝保勦力同心
共圖勦賊豈料其毫無調度任性行私卽如彼
此出隊交鋒喫緊之時勝保每撤隊先回一切
掣肘情形難以殫述明知

宵旰憂勤何敢以瑣屑上瀆而是非曲直有不得不直

陳於

君父之前者惟有懇

恩另派大員來東查辦奏入

上命軍機大臣傳諭勝保善祿崇恩曰據張亮基奏稱連日進攻獲勝各情所奏是否鋪張入告攘功自居著勝保善祿崇恩秉公確查據實具奏張亮基原帶

練勇二千人諒已遵旨派員管帶該勇等必須統帶得人方可隨時驅策現在大兵雲集著勝保卽督飭各路員弁兵勇乘勝進攻賊巢與崇恩設法內外夾攻不准稍稽時日

同日曾國藩奏言臣自靖港甯鄉新康三獲勝仗後卽令各營馳赴湘陰截剿賊聞官兵水陸大至當卽退出湘陰探悉西湖口賊船尙多當

派五品頂翎張宏邦等駛駕礮船迎擊轟斃賊
匪數十名燒燬賊船十餘隻守備褚殿元等三
營共奪獲賊船十隻勇目黃忠等復在團山地
方奪獲賊船逆黨屢經懲創全數竄逃岳州亦
已退出臣前派之陸路各營二月二十五六等
日先後抵岳臣亦督帶水軍於三月初二日行
抵岳州查洞庭湖周迴八百里港汊紛歧最易

藏奸全湖入江之所名曰荆河上游爲監利荊
州其虎渡河等處多與湖水相通屢獲賊探供
稱賊內藏湖汊外竄荆河俟官軍東下再在上
游滋擾等語臣現駐岳州多派哨船分巡內則
哨探湖中港汊外則哨探荆河以上必須逐處
搜查上游肅清然後壹意東下至陸路各軍屢
據稟報崇陽通城先後失守臣已札飭貴東道

胡林翼等帶勇千餘前往勦辦若能乘臣在岳時就近將崇通股匪辦有頭緒則馳赴下游可無彼此牽掣之患奏入

上命軍機大臣傳諭駱秉章曾國藩曰據曾國藩奏搜捕湖汊並勦辦崇通股匪各情是水軍雖已抵岳而馳赴下游尙無確期現在湖北賊情喫緊不但漢口漢陽亟應克復卽孝感等處亦豈宜久任獒狴況雲

夢應城退竄之賊尙在潰口上下盤旋台湧兵力過
單未能兼顧襄陽武勝均屬扼要之區旣未便移兵
助剿前調松潘建昌兩鎮官兵尙無抵荆消息佈克
慎所帶東路弁兵數祇千名卽陸元烺派撥之防兵
練勇全到湖北仍須有水路蔽船方能夾擊鄂省兵
勇單弱豈可仍在上游遲滯著懷遵前旨迅赴湖北
先清江漢其湖汊藏匿餘匪想已無多著略乘章嚴

飭地方文武實力搜捕崇陽通城各匪盤踞未久當
易撲滅著卽飭胡林翼等分路勦辦曾國藩所統水
勇旣不准青廉等留守武昌若略乘章欽藉曾國藩
爲保障任意牽留朕亦不能允行也

十九日 戊午 勝保奏言臣於十四日攻克賊巢獲

勝後該逆攻城愈急連挖地道城內兵勇多方
迎拒破其地道五處俱遠逾二里深至丈餘臣

知該逆慣用此技恐其所挖尙不止此諄飭城內一律挖濠注水破其詭謀不意該逆於城之西南挖地道兩處直從水底穿過十六日丑刻地雷震發城西面火光燭天西門及西南城角兩處登時塌陷賊衆於西門蟻附登城城外關廂盤踞之賊未及入城者尙多臣麾令官兵向彌陀寺以南賊壘進攻連破二處斃賊五六百

名復用噴筒火彈將其西關外賊營燃燒忽西南風大作賊匪順風揚沙人馬俱難立足臣此時不難卽以身殉惟念大局攸關儻冒險輕進再有疏虞更何以力圖勦賊不得已暫行收隊城中逃出難民供稱本日地雷外發本地民勇先潰臣所撥入城兵勇及山東官兵抵死巷戰逾時之久俱各陣亡思之深爲痛惜查提督桂

明本係留防劉家口一帶茲接該提督來文已
於初七日行過蘭儀計日內可以到營未便復
令折回已飛飭該提督來營助勦德勒克色楞
亦帶兵到營臣仍當竭盡心力相機勦辦此次
州城失陷臣雖無地方之責惟係統兵大員未
能兼顧咎無可辭相應請

旨將臣暨善祿一併交部議處

同日山東巡撫崇恩奏言本月十五日南風大作是夜風勢愈烈臣知該逆詭譎異常每乘風夜非逃卽攻隨帶隊於城北一帶梭織巡視丑刻忽聞西南正西有聲甚厲少頃火光突起人聲嘈雜臣知城中有失隨同勝保飛奔向南撲救奈一路皆有賊巢攔阻勝保與臣馳至北門賊已憑城施放槍礮猶聞城中喊殺之聲知爲

巷戰無如崇墉屹立莫可措手臣調度無方布置不善咎無可辭惟有顙懇

天恩將臣交部治罪均奏入

上命軍機大臣傳諭勝保德勒克色楞善祿崇恩曰逆匪竄踞臨清城外該州北門外並無賊匪儘可內外策應何至任賊復用地雷轟陷城池勝保善祿統領重兵救援州城豈得以無守土之責藉詞諉卸崇恩

本在城內不知督率文武兵民同心固守輒至城外
勝保軍營意圖趨避該大臣等貽誤之罪均無可辭
臨清州城糧米軍械頗多逆匪勢必負嵎久踞桂明
行過蘭儀計日可到德勒克色楞已帶兵到營著該
大臣等卽督飭官兵設法進剿迅將城外賊壘盡數
鏟除勿令該逆恃爲犄角庶可四面兜圍亟圖克復
逆匪詭譎異常且意在救援阜城之賊勝保統領全

軍尤應防其水陸北竄其東昌濟南一帶卽責令崇
恩嚴飭地方文武妥爲布置該大臣等務當迅圖攻
勦以贖前愆儻不知奮勉致此股逆匪久踞臨清或
肆行竄擾國法具在豈能屢邀寬典耶

上又命軍機大臣傳諭僧格林沁曰逆匪攻陷臨清大
肆猖獗該處爲水路總匯幾於防不勝防刻下阜城
之賊業經挖濠圍困僧格林沁當通盤籌畫卽將阜

城餘匪設計殲除如能迅速奏功則督兵直赴臨清
會勦非但可爲勝保援應實所以保全大局儻藏事
稍遲致該逆潛通消息或有勾連必至更難措手僧
格林沁接奉此旨後應如何設法進攻直擣賊巢爲
移兵赴援之計務當籌畫萬全迅速具奏

又命軍機大臣傳諭桂良曰臨清州城失守直東毗
連要隘必須加意嚴防張殿元駐紮大名並清河威

縣各處防兵是否足敷堵剿此外扼要處所應如何
添兵防守著桂良妥速統籌與勝保等隨時知照毋
得稍有疏虞

上又命軍機大臣傳諭王履謙長臻楊以增崇恩英桂
百勝王夢齡曰皖省之賊竄擾臨清以致州城失陷
北路軍情緊急若南路賊匪續有竄逸畿輔地面何
日得以肅清著王履謙長臻楊以增崇恩英桂及百

勝王夢齡等懷遵疊次諭旨嚴飭地方及河工文武
各員分段設防並著將每段派兵若干名列礮若干
位繪圖貼說迅速具奏並聞賊匪偷渡時每起不過
數百名乘零星半渡之時用礮轟擊不難盡數殲除
何得藉口於賊多兵少任聽從容紮筏陸續偷渡自
此次申諭之後儻再稍有疏虞賊由何處偷渡卽將
該管員弁及各上司以軍法從事決不寬貸

上諭內閣曰賊用地雷轟陷臨清州城勝保身爲統帥督率無方善祿先抵山東不能力遏兇鋒崇恩身任地方毫無布置以致城池失陷均屬罪有應得勝保善祿崇恩均著摘去頂戴卽行革職帶罪自效仍責令督率官兵合力攻勦儘再不能迅速克復必將勝保等從重治罪其城內文武下落著卽查明具奏

二十日

己未

上命軍機大臣傳諭載齡曰逆匪於十五日夜用地雷轟陷臨清州城北路情形萬分緊要京外東西各營統歸載齡調遣著該侍郎隨時審度機宜統籌守禦尤應多設確切偵探隨地密拏奸細天津滄州一帶兵力單弱並著載齡設法兼顧仍與僧格林沁勝保桂良等聯絡聲援妥籌布置軍情變幻靡常該侍郎應否移營防堵務須熟籌緩急斟酌辦理

二十一日

庚申

勝保奏言該逆自十六日攻陷州

城十七日臣親督官兵進攻東面賊壘賊竟堅
匿不出忽附近壘中突出賊衆二三千人分兩
股來撲我兵亦分投迎擊傷斃賊黨二百餘名
餘賊俱伏壕內我兵追至槍箭並發旋將壕內
賊匪全數殲斃其壘中之賊不敢出援仍復堅
匿臣與將士等恨不生啖其肉以抒積憤而連

日兵力疲乏暫令撤隊再圖進取查城中火藥
無多各倉廩並囤積糧食之所業令知州張積
功等放火焚燬是以賊陷城後亦大失望仍分
聚城外關廂就此時賊勢而論果能就地芟除
臣豈敢稍遺餘力奈賊黨衆多一經受創輒復
堅匿且其志本圖北犯勢必乘隙而竄地方遼
闊大兵難以合圍不得不先事豫防爲勦而兼

堵之計除飛催桂明及穆輅雙禧迅各帶兵前進外臣酌度情勢首以遏賊北竄爲目下要務賊果南奔惟有盡力追擊其西北正北似可無虞德勒克色楞駐營在土城西南以扼賊由威縣竄擾大名之路崇恩帶兵嚴堵東面其威縣之南尙有僻路可由館陶冠縣繞赴大名已派馬隊晝夜偵探一聞賊警飛速報知卽當渡河

追勦其穆輅雙禧之兵先令扼要駐守再行酌
度緩急調撥李湘棻所帶之勇未到當令其卽
在東昌一帶扼守臣仍激勵將士勦力同心賊
守則設法進攻賊竄則合力追截不敢存一毫
畏難之見奏入

上命軍機大臣傳諭勝保德勒克色楞善祿崇恩曰前
因臨清失守將勝保等革職責令迅圖克復姑予薄

責不卽加罪原冀其稍知愧奮刻卽圖功乃本日所
奏十七日進攻東面賊壘不過斃賊二百餘名追將
濠內賊匪全數殲斃亦未將賊壘卽時攻奪空言積
憤於事何濟且據稱城內倉廩及積糧處所均爲知
州張積功等焚燬該逆失望仍分聚城外關廂是城
中賊匪無多所賴關廂村莊爲犄角之勢若不趕緊
設法將城外賊巢盡行平毀州城終難克復頓兵日

久師老力疲又必復蹈故轍桂明於十八日已抵大名仍著勝保飛調到營並另派得力大員將雙禧穆輅之兵迎提統帶酌量地方駐守計各路徵調之兵將次到齊德勒克色楞崇恩分駐西南及東路其東南一路必應顧及況東昌亦商賈輻輳素稱饒裕之區豈可稍有疏失必俟該逆竄往再籌盡力追擊已落後著李湘棻厲恩官兵力是否足資扼截該大臣

可以就近調遣令卽堵守臨清東南之路該大臣固當嚴扼賊匪北竄仍須面面兼顧迅圖收復州城毋再遲延致干重典

同日琦善奏言臣接奉

諭旨令將三汊河防堵官兵一千名卽飭參將安勇遊擊毛三元帶領回東以資防剿自當欽遵辦理伏念臣節制江北所以力扼瓜州等處江面者

卽所以杜北竄並非專顧南路也現在瓜州尙
爲賊踞三汊河適當其衝必須有兵駐守臣駐
營秦家橋控扼瓜州儀徵兩路防勦兼施時有
顧此失彼之慮自三汊河東岸下抵瓜州處處
濱江雖陳金綬穆克登額等各守要隘而臣須
時時代爲籌畫兵愈分則愈單所以能勉強支
持者實賴三汊河營盤力扼中權以便東西岸

官兵分張兩翼庶幾戰守交資水陸有備今若將山東防兵裁撤則官兵兩岸齊進難保賊船不由水路闖入儻分兩岸之兵移紮三汊河則東西兩面空虛賊必由高寶而趨清江由清江而竄邳宿又偏山東之南境北路之賊復添一股是調兵北行適所以縱賊北竄權山左之緩急者或未計江北之安危如張亮基必謂此係

勁兵足資防勦臣自應飭令回東斷不敢留以
自衛但三汭河地方緊要必須另撥官兵前來
更換查舒興阿原帶之陝甘兵現在廬州歸和
春統帶內有河州西甯兵各五百名與山東兵
數相符可以前來調換如蒙

俞允一經調到卽飭參將安勇等帶兵星馳回東是否
可行恭候

聖裁奏八

上命軍機大臣傳諭琦善曰現在賊陷臨清所調各路官兵將次到齊已命勝保等迅圖克復若俟山東官兵調回亦屬緩不濟急且淮北情形喫重雖有袁甲三秦定三分駐臨淮正陽仍須和春福濟統籌兼顧力杜逆匪北竄所有河州西甯官兵未必能調赴揚州其張亮基請調回山東官兵亦著毋庸調回仍留

三汧河交琦善調遣

同日向榮奏言臣前將二月二十三日攻打神策門情形馳奏連日疊次進攻朝陽太平通濟各門無如賊衆死守屢攻均未得手內應事機已洩該逆逐日在城搜殺各門俱閉出入嚴緊現將逃出內應妥爲安撫以期收拾人心另圖克復貴州鎮遠等營官兵一千名已遵

旨派令遊擊鮑雲翥管領馳赴徐州歸秦定三統率臣
現帶之兵計存六千數百名中多疲乏必須添
調勁兵前來以憑更換撤遣合無仰懇

天恩飭令廣東選調潮州黃岡惠來等營兵一二千名
令總兵壽山統帶與福建漳州雲霄詔安同安
等營兵一二千名前來江南助剿以資得力奏
入

上命軍機大臣傳諭向榮曰臨清州城失守北路情形
緊急惟望金陵及早收復埽穴擒渠茲閱向榮奏報
金陵疊次籌攻均未得手是向榮於收復之事尙屬
毫無把握已諭令王懿德葉名琛各調官兵二千名
前往向榮軍營該大臣務當先就現有兵勇設法進
攻將金陵及鎮江城池次第收復則皖豫賊匪有所
牽制自不至續行北竄北路勦辦較易爲力

上又命軍機大臣傳諭王懿德葉名琛曰金陵爲首逆
盤踞之區自應添撥精兵助剿以期及早收復著王
懿德於漳州雲霄詔安同安等營葉名琛於潮州黃
岡惠來等營各挑選精兵二千名派員管帶其廣東
官兵並著潮州鎮總兵壽山統帶迅速前往向榮軍
營聽候調撥

同日和春福濟奏言三月初十日臣等令各營

四面攻城分派江忠濬等帶兵攻打東西南北
大西得勝等門臣和春居中調度與秦定三往
來督戰臣福濟督兵赴各路接應北門內衝出
賊匪五六千人分三路來撲我軍分三路迎剿
一面飛調鄭魁士等分左右中三路進攻立斃
賊匪無數該逆猶敢拌死迎敵我軍奮勇爭先
又斃賊匪多名賊漸敗退此日之戰約斃賊匪

一千餘名惟署總兵全玉貴打仗受傷該營紮於北門外偏近大橋爲逆匪出北門必由之路隨令秦定三前往駐紮十三日逆匪突出四五千人來撲秦定三督兵出營攻擊臣等派隊飛往接應又斃賊匪無算該逆敗走落水死者甚多容再設法圍剿迅克圖復

同日袁甲三奏言查臨淮爲水陸要路賊之窺

臨淮無異於窺正陽因臨淮有備而正陽無備
且六安又爲捷徑所以旁竄耳現在自淮以南
鳳定土匪大肆猖獗臣擬到臨後卽行分兵勦
辦臨淮至正陽爲鹽船必由之路近因粵逆竄
擾上自六安下至懷遠沿河皆爲土匪盤踞商
賈無路可通臣到臨後必當竭盡心力疏通河
道然正陽一有阻滯下游徒勞罔功至於正陽

以南由六安至舒桐安慶等城逆匪並不甚多
亦未踞守城池民間蓄髮者頗多含垢忍辱爲
苟延性命之計此時正陽駐紮重兵一面防賊
北竄一面布置進攻舒六與廬州作接應之勢
風聲所到賊有戒心且百姓聞之亦生感奮同
仇禦侮必有可爲內應者至賊蹤未到之區聞
霍邱縣土匪猖獗該縣與六安聲息相通儻逆

賊乘亂而至霍邱一失直達潁郡則皖豫楚處
處可通正陽亦不能守矣現奉

旨派秦定三扼守正陽必須多帶精兵與劉玉豹會合
一處且防且勦以收民心而分賊勢駐防陳州
之牛鑑亦宜進駐潁州以壯聲威庶北竄門戶
處處聯絡臣駐守臨淮遙作各路聲援如有可
進之機亦卽酌量前進斷不敢一隅株守自倖

無罪總之六安來路旣扼不惟潁郡無虞豫省
歸陳及宿徐以北均可無虞臣思慮所及不敢
稍存畛域伏祈

聖明垂察均奏入

上命軍機大臣傳諭和春福濟曰前諭和春等撥兵交
秦定三迅赴正陽關霍邱一帶嚴杜賊匪西北竄路
霍邱土匪狡獪該縣與六安接壤爲正陽關之犄角

此處一有疏虞則正陽亦難固守現據和春等奏報
勝仗秦定三尙在行間是直坐擁重兵竟置全局於
不顧耶著卽派撥兵勇迅交秦定三剋日統帶起程
不准稍有耽延現在六安舒城桐城安慶等處逆匪
均不甚多祇因大兵專顧廬州人無固志以致該逆
肆意往來若秦定三移兵正陽或援霍邱或攻六安
時時出賊不意備以兵威不但賊難他竄卽廬州攻

勦亦易得手向榮現派貴州兵一千名前往徐州此
項官兵赴徐道路紆折著和春等飛提迎催卽交秦
定三統帶但不可坐待此兵致誤事機仍著先撥官
兵數千速令秦定三馳往

上又命軍機大臣傳諭袁甲三曰皖省情形敗壞至此
卽使廬州計日克復亦難收拾援潁郡以固正陽實
係緊要關鍵袁甲三現辦捻匪如大致已定卽應迅

赴臨淮該處距宿州不遠聲勢儘可聯絡鳳陽定遠等處土匪均著隨地勦辦亦不必專駐臨淮致成株守至淮河上下如何設法疏通總當力籌妥辦不得誘之正陽阻滯下游徒勞無功也和春等已飭恩錫督帶兵勇前赴臨淮所帶之兵究係若干就現在情形而論似臨淮之兵多於正陽而正陽之防重於臨淮該給事中既能統籌全局即可與秦定三和衷商

推互相策應據稱近日正陽關以南民情被賊煽惑
總由安慶舒桐六安一帶官兵不能兼顧以致脅從
此時惟有力遏廬州臨淮正陽霍邱等處要隘以圖
進攻轉移之術全在隨時相機籌辦不可諉之時事
難爲也

上又命軍機大臣傳諭英桂曰皖省霍邱一帶土匪狍
猖其地距潁州甚近若有疏虞則皖豫處處可通歸

陳等處亦甚可慮著英桂卽飭牛鑑帶領兵勇剋日馳赴潁郡以資防勦袁甲三現赴臨淮庶彼此聲勢聯絡固皖省之藩籬卽以保豫疆之門戶其蘭儀河口仍當嚴密巡防毋任賊匪續渡彰德地方官民團練尙堪自衛衛輝地面則團練寥寥殊不足恃著卽督飭該處文武督率紳民實力團練毋稍疏懈英桂現時究竟曾否出省並歸德信陽兩路防堵情形作

何布置著卽統籌全局不可株守省垣致滋貽誤

同日崇綸青巖奏言近日賊船上下分竄倏去忽來三月初四日漢口開出逆船一百餘隻小河內陸續出船無數乘風直撲前來卽經城上用礮連環轟擊逆賊頭船直冒槍礮紛紛登岸分撲武勝漢陽兩門臣等督飭將弁奮勇直前擊殺一百餘名江上賊船始退其潰逃賊匪登

船不及落江溺斃者甚多彼時漢陽以上鸚鵡洲泊有賊船四十餘隻亦乘時渡江直撲白沙洲大營經遊擊侯鳳岐等礮船擊退初五日東南風順密飭侯鳳岐等督帶礮船渡江攻擊鸚鵡洲賊船賊始畏怯移匿小河之內現聞竄赴上游金口逃散者不少查漢陽盤踞賊船上下分竄約有二千餘隻其往下游者探報已過黃

州其上竄者自金口登陸分往咸甯通山蒲圻等縣現在小河口內尙有賊船一千數百餘隻探得賊匪不過二三千若有一枝援軍乘此機會合力攻剿可以解圍臣等屢次函咨台湧令其速遣佈克慎等統帶已招兵勇二千餘名由德安直抵漢鎮日久並無音耗惟有再懇

天恩飭催台湧速爲應援奏入

上命軍機大臣傳諭台湧青麐曰漢陽漢口一帶逆船
遊駛江面意圖直撲武昌此次水陸交戰尙能稍挫
賊鋒省城現存兵勇約有萬餘兵力不爲單弱青麐
等惟當鼓舞士氣激勵民心不得以外援不至爲詞
徒深焦灼曾國藩水上軍聲威頗壯本日復諭令
迅由岳州統師東下以爲楚北應援並陸元烺派撥
應援兵勇著一併迎催前進會合夾攻但使江路一

通不獨武昌南北兩岸聯爲一氣卽上下游分竄逆
匪亦易於次第殲除台湧節制兩湖無論何路勦匪
事宜均應熟籌兼顧相機而行荊州一帶籌防是否
嚴密孝感漢陽等處如何督率進攻佈克慎以獲咎
大員特恩派令帶罪殺賊著卽飭令分投進剿以期
稍贖前愆

上又命軍機大臣傳諭曾國藩曰昨諭曾國藩迅由岳

州統領舟師馳赴楚北爲肅清江漢之計原以該省
軍情緊要上游荆江一帶籌防至重孝感等縣賊勢
方張屯踞漢陽漢口逆衆仍復肆意遊駛此股一日
不除武昌一日不能解圍著曾國藩迅卽遵照前旨
剋日帥師東下迎賊所向併力殲除此時得力舟師
專恃曾國藩水上一軍惟當權衡緩急相機速辦朕
旣以勦賊重任付之曾國藩一切軍情不爲遙制應

如何與台湧青麐等聯屬聲威互相援應並著隨時
妥籌毋誤事機

同日桂良奏言賊匪旣踞臨清直隸毗連處所
誠應倍加嚴防查穆輅雙禧前次所帶官兵業
已到防分布扼守其澤潞官兵一千名亦經勝
保札令在各要隘駐紮第恐賊勢狡猾尙須添
兵堵禦當於駐守正定之大同官兵內抽撥五

百名就近馳往直東交界交張殿元擇要分紮
以期嚴密奏入

上是之

同日

上諭內閣曰自逆匪竄擾以來所過州縣村莊慘遭蹂躪曾經疊降諭旨令各省紳民辦理團練既可保衛身家又可隨同官兵勦賊近覽軍營奏報各該處紳

民人等或殺賊被害或殉節捐軀實屬深明大義均堪憫惻著各路統兵大臣暨各該督撫等迅速查明凡逆匪經過地方鄉團紳民人等有能奮勇剿賊者隨時分別奏保朕必立加優獎其陣亡鄉勇除隨同官兵打仗例得請卹外其有激於義憤殺賊殞身者無論防勦逆賊土匪悉准令紳民於各該地方建立總坊一併題名並從祀各州縣忠義祠以昭激勸

臣等謹案鋤奸詰暴惟守土責有專司取義成仁在臣工分所當盡至於編氓之賤椎魯之夫目未識夫詩書焉能責以名義乃自軍興以來無論仕族寒門販夫走卒罔不同心敵愾勦力效忠良由我

朝深仁厚澤二百餘年其入民心者既深斯報國家者愈重今

文宗顯皇帝復降

德音表揚忠義有功者加之獎勵死事者報以馨香

詔旨特頒賢愚同感誰不爭相奮勉願許馳驅異日巨

寇削平大功迅奏雖藉三軍之用命亦由衆

志之成城也